

Froocht endlich emol die Leit!

Omm Mondaach warnmerr beim Schorsch zum Kaffee oigelade, weils Kättche Quetschekuche gebacke hadd unn uns unn aach de Karl unn soi Paula widder mol sehe unn heern wollt. Unn wies so iss, noochem Kaffee hawwe sich unser Mädcher bei emm Glas Woi iwwer Kronkheite unnerhalle unn mir beirer Flasch Bier iwwer die Bolidik.

Uff oomol sät de Schorsch: Habbderrs geseh unn gelese, in Berlin hott die Pirate-Partei enn Haufe Stimme griecht. Was dut ihr dann defoo halle, wenn mir in Flerschem aach so e Partei uffmache dete?

Ja, saach ich, ich moon nor, uffem Moo hadde mir joo koo Pirate, awwer wissder noch, was mir immer uff de Kelb gespillt hawwe?

Ei sicher, rieft de Karl, Indianer. Du, Honnes, warst immer de Old Schätterhänd, ich war de Winnetuu unn de Schorsch war de Old Schurhänd. Mensch, dess mache merr, die Indianerpartei von Flerschem, dess wär doch was.

De Schorsch hott gemoont: Soll de Karl sich dann e Fedder uff die Glatz klewe?

De Karl hottem Schorsch oo gestumpt unn gesaat: Sei du mol ruhisch, Schorsch, so wie du heit aussiehst konnst du nimmi als Old Schurhänd mettmache, du werrst de Säm Hawkens, wenn ich mich nicht irre, hihhi.

Doo hawwe merr alle drei gelacht unn ich habb gesaat: So e bissi frische Wind im Flerschemer Parlament det nitt schade. Ich will eich saache warum: Omm letzde Somsdaach warnn merr in de Stadt, uffem Norma-Parkplatz, doo war koon Platz mehr frei, mir mussde zum Parke warte bis ooner fortgefahrr iss. Also iss doch in de Wickerer Strooß unn drummerumm noch was los, obwohl die Doktern unn die Bonke dort joo somsdachs zu hawwe. Awwer doo iss de Schlecker, de Norma, die Buchhondlung, de Fri-seur Hommer, uff de onner Seit vom Rothaus de Blumme-Jan unns Reformhaus, unn vor alle Dinge iss dort die Post beim Scharfebaum, doo gehen doch die Leit hie.

Grinst de Schorsch: Mir mache also die Indianer, awwer de erst missde merr mol e Laacherfeiersche mache, drauße uff de Kelb. Awwer glaabt merrs, uff de Boddem kann ich mich nimmi setze, ich kumm dann nimmi hoch.

Unn ich erst, saach ich, naa, dess brauche merr nitt. Mir von de Indianer-Partei dete unser Zelt uffem Norma-Parkplatz uffstelle, dete e Peifsche raache unn dete mett de Leit redde: Saacht emol, was solle merr mache, dass der Platz hier unn die Strooße ringserumm belebt werrn mett Geschäfte? Wenn ihr schunn hier uff dem Parkplatz seid, was kennte merr eich biete, was wär ferr eich noch interessont zum Oikaafe?

De Karl hott mettem Kopp gewackelt. Ihr Männer, ich waaß was ihr saache wollt. Es sieht doch aus, als det sich uff dem Axthelm-Gelände, uffem Marienplatz, wie de Honnes immer saache dut, sich erst was due, wenn nächstjohr im Summer die Wahl vom Beiemooster geloffe iss, awwer dess iss doch verschenkt Zeit. Himmelnochemol, froocht endlich emol die Leit!

Ja, saach ich, doo hocke se alls sesomme, streite sich unn warte bis die Zeit erumgriecht. Awwer wenn dann die Pirate odder die Stadtindianer kumme unn genau dess mache, nämlich die Leit frooche wasse wolle unn doodeferr dann Zustimmung krieh, dann guckese all dumm.

Doo sät de Schorsch: So kimmt dess, wenn ich mich nicht irre, hihhi!

Uff, ich habe gesprochen. Hauw!, sät de Karl.

Eiern Honnes